

Presentacion buki 'Un Siglo di recuerdo'

DEN HAAG, Hulanda – Na Cas di Aruba a tuma lugar presentacion di e buki nobo di escritor Richard de Veer cu ta hiba e titulo 'Un Siglo di Recuerdo'. E presentacion a keda realisa en cooperacion cu Simia Literario.

E programa a cuminsa cu un synopsis di e biografia di Richard de Veer, kende a nace y a lanta na Aruba. Tanto na Aruba como na Hulanda ela traha como docente Ingles, Matematica y Spaño. Aunque cu Richard tabata conoci den circulo di su famia y amigonan di ta scirbi poesia, ta te cu 1996 ela publica su prome buki di storia 'Si ta mi mes', cu ta contene un cantidad di cuentanan di Compa Nanzi. E storianan ta yena cu humor basa ariba situacionnan di e siglo pasa, pero unda keto bai Compa Nanzi ta keda e homber cu triki!

Richard a contribui cu dos storia na e publicacion di Simia Literario na 2004 titula 'Bentana Habri' y Wim Rutgers a usa un frase di Richard for di su storia 'E regreso di Compa Nanzi' pa su publicacion 'Tropentaal'. Mester remarca cu su conocimiento di palabranan di antes y di dichonan ta sublime. Den su storianan e ta duna esakinan un contenido nobo den su manera cla di scirbi. Den su buki 'Un siglo di recuerdo' cu ta carga e subtitulo 'loque buki di historia no ta conta' e escritor ta hiba e lesadornan na temponan pasa. Su discipcionan den estilo di Gabriel Garcia Marquez, ta contribui na un pida "oral history" pa hendenan di tur edad.

E develacion di e buki a tuma lugar door di Olga Orman y Joan Lesley di Simia Literario. Richard siguiientemente a haci entrega di un ehemplar di su buki na sr. Kenky Oduber, director di Cas di Aruba, cu a reemplasa Minister Plenipotenciario Frido Croes cu no por tabata presente pa motibo di salud. Tambe Richard a haci entrega di su buki na su yiunan como aprecio pa nan sosten.

Despues di entregamento Richard de Veer y Olga Orman a lesa un par di capitulo for di e buki. Na final tabata tin oportunidad pa cumpra e buki y e escritor tabata disponibel pa firma e bukinan cu ela vende.

